



## MANIFESTO CON MOTIVO DO DÍA INTERNACIONAL PARA A ELIMINACIÓN DA VIOLENCIA CONTRA AS MULLERES

25 NOVEMBRO 2023

Desde hai varias décadas, o 25N, Día Internacional pola erradicación da Violencia contra as Mulleres, é un momento excepcional para reivindicar, reclamar e lembrar ás persoas con responsabilidades e a toda a sociedade en xeral que, mentres persista a violencia patriarcal, non poderemos conseguir sociedades xustas, igualitarias e respectuosas cos dereitos humanos.

A prevalencia das violencias é cada vez máis preocupante, tal e como recolle a recente **Enquisa Europea de Violencia de Xénero (EEVG)** con datos de 2022, que sinala cifras extremadamente alarmantes de presenza das violencias patriarcais, aínda que tamén debuxa un contexto positivo en relación co maior coñecemento e recoñecemento destas violencias por parte das mulleres máis novas.

Aínda que nas institucións educativas en xeral, e nas universidades en particular, se avanzou moito na igualdade entre mulleres e homes, aínda perduran situacións que violentan as estudantes, as investigadoras e docentes, e as traballadoras do ámbito da administración e servizos. Nese sentido, son relevantes as achegas do **"Proxecto Europeo UNISAFE, para acabar coas violencias de xénero na Academia"**, pois conclúe que a principal razón pola que non se denuncian agresións machistas no contexto universitario é porque, en moitas ocasións, a vítima dubida da gravidade do sufrido, dúbida de se será crida, dúbida de se haberá unha resposta para o vivido. É importante non normalizar nin naturalizar as violencias sufridas, é importante que tamén nas universidades avancemos cara á visibilización de todas e cada unha das violencias machistas que se exercen no seu seo.

As universidades, como institucións de ensino superior, debemos contribuír a facer fronte a esta situación achegando evidencias científicas, formando as futuras xeracións de profesionais con perspectiva de xénero, elaborando recursos útiles e efectivos para toda a sociedade e participando tanto individual como colectivamente da cultura de igualdade que identifica, visibiliza, denuncia e illa os comportamentos e actitudes machistas.

Ademais da continuidade das violencias machistas tradicionais, xorden novos modos de misoxinia, tales como o *gendertrolling* de 'turbas dixitais' no universo *en liña*. Neste contexto, sobresaen novos actores políticos, como a 'manosfera', alentados por movementos transnacionais que promoven actitudes e perspectivas misóxinas e antifeministas. A súa influencia na formación de opinións e a propagación de ideas políticas extremistas, están modelando imaxinarios e condutas desde idades temperás. Un claro exemplo diso é o chamado 'caso Almendralejo', que puxo en evidencia a violencia machista dixital exercida por un grupo de mozos menores de idade sobre máis de vinte nenas e adolescentes, cuxa imaxe foi utilizada para crear pornografía mediante intelixencia artificial. O alcance mediático deste caso serviu para que a sociedade tome conciencia da gravidade do problema do mal uso dos avances tecnolóxicos, pero non se trata dun caso illado, pois as expresións vexatorias contra as mulleres no mundo dixital reproducense constantemente.

Un ano máis segue sendo necesario denunciar que a violencia de xénero é unha violación dos dereitos humanos na que, as universidades, como parte da sociedade, temos a responsabilidade de implicarnos activamente. Por iso, este mes é importante tamén mostrar a nosa solidariedade coas nenas e mulleres de todo o mundo que están a sufrir restricións dos seus dereitos e a ser libres e iguais. Hoxe, en Palestina, Ucraína, Irán, Afganistán e outros moitos lugares do mundo.

Nesta ocasión, apelamos á xenealoxía feminista, á súa historia, á produción de coñecemento académico con perspectiva de xénero, á forza das mulleres novas e á dimensión humana da sociedade, para tecer, máis que nunca, mundos de esperanza feminista, outro mundo posible, libre de violencias contra as mulleres e nenas, porque os avances e o compromiso social e institucional é cada vez maior fronte a todas as violencias patriarcais no espazo universitario e na sociedade, en xeral.

Hoxe, e todos os días do ano, reivindicamos o feminismo como ferramenta de emancipación para conseguir unha sociedade na que poidamos ser e estar. Seguindo o valoroso exemplo das campioas mundiais de fútbol da nosa selección, sumámonos ao seu clamor: #Seacabó #Acabouse

**As universidades abaixo asinantes forman parte da Rede de Unidades de Igualdade de Xénero para a Excelencia Universitaria**

|   |  |
|---|--|
| <p> Universitat d'Alacant<br/> Universidad de Alcalá<br/> Universidad de Almería<br/> Universitat Autònoma de Barcelona<br/> Universidad Autónoma de Madrid<br/> Universitat de Barcelona<br/> Universidad de Burgos<br/> Universidad de Cádiz<br/> Universidad de Cantabria<br/> Universidad Carlos III de Madrid<br/> Universidad de Castilla-La Mancha<br/> Universidad Complutense de Madrid<br/> Universidad de Córdoba<br/> Universidade da Coruña<br/> Universidad de Deusto<br/> Universidad de Extremadura<br/> Universitat de Girona<br/> Universidad de Granada<br/> Universidad de Huelva<br/> Universitat de les Illes Balears<br/> Universidad Internacional de Andalucía<br/> Universitat Internacional de Catalunya<br/> Universidad de Jaén<br/> Universitat Jaume I de Castellón<br/> Universidad de La Laguna<br/> Universidad de La Rioja<br/> Universidad de Las Palmas de Gran Canaria </p> | <p> Universidad de León<br/> Universitat de Lleida<br/> Universidad de Málaga<br/> Universidad Miguel Hernández de Elche<br/> Universidad de Murcia<br/> Universidad Nacional de Educación a Distancia<br/> Universitat Oberta de Catalunya<br/> Universidad de Oviedo<br/> Universidad Pablo de Olavide<br/> Universidad del País Vasco<br/> Universidad Politécnica de Cartagena<br/> Universitat Politècnica de Catalunya<br/> Universidad Politécnica de Madrid<br/> Universitat Politècnica de València<br/> Universitat Pompeu Fabra<br/> Universidad Pública de Navarra<br/> Universitat Ramon Llull<br/> Universidad Rey Juan Carlos<br/> Universitat Rovira i Virgili<br/> Universidad de Salamanca<br/> Universidade de Santiago de Compostela<br/> Universidad de Sevilla<br/> Universitat de València<br/> Universidad de Valladolid<br/> Universitat de Vic- Universitat Central de Catalunya<br/> Universidade de Vigo<br/> Universidad de Zaragoza </p> |
|---|--|